

雍
州
金
石
記

雍州金石記卷八

唐

太子賓客白道生碑 正書

今在西安府城東十五里鮑陂近出土中移於
土穀祠前碑首已失題曰大唐故左武衛大將
軍贈太子賓客白公神道碑銘并序朝議郎行
尚書禮部員外郎翰林學士賜緋魚袋于益奉
勅撰宣議大夫行將作 翰林詔上柱國賜
紫金魚袋華宗奉勅書并篆額略云公諱道生
其先呼韓之宗祖廣琮雲麾將軍左羽林大將

軍父崇禮忠武將軍左金吾衛翊府中郎將公
鎮在疆場統其蕃部尋為寧朔州刺史終於左
衛大將軍春秋六十以永泰元年三月廿四日
遷窆於萬年縣鳳栖原永泰元年歲次乙巳三
月壬辰朔廿四日甲寅建

先塋記 篆書

今在西安府學碑已斷裂有云大歷惟二刊刻
貞石其撰文人名適當斷處僅存一述字從子
陽冰書金石文字記作季卿誤碑側有記大中
祥符三年重開

三墳記 篆書

今在西安府學碑無題首已斷為二其文有云
先侍郎之子曰曜卿字華名缺卿字萬天缺卿
字榮寬三墳季卿述陽冰書 大歷改元之明
年於斯刻石

美原田真人碑 大歷六年九月

今在富平縣美原鎮題曰美原縣永觀

朝散大夫 并州別駕上柱國蘭陵蕭森

政撰并模晉王右軍書相傳田真人拔宅上昇
處也

陀羅尼經石幢銘

僧昔真撰

布衣康玠行書

今在富平縣六井金石文字云大歷六年十月

慈州刺史王履清殘碑

正書

今在高陵縣碑首篆書唐故慈州刺史王府君

神道碑題曰唐故同朔方節度副使紫金光祿

大夫試太常卿兼慈州刺史

以下缺

朝散大夫

行河中府功曹參軍上柱國賜魚袋上谷侯冕

撰府君諱履清字履清京兆萬年人考尚賓歷

原州參軍事定遠城兵曹參軍贈紫金光祿大

夫以下缺以大歷十一年正月廿四薨於官舍

兄履堅朝散大夫豐州長史弟履濟朝散大夫
慈州別駕子綸朝散缺葬於高陵之奉正原大
歷十二年二月廿七日建碑僅存上半文多斷
續惜不能盡記也

清源公王忠嗣碑 正書

今在渭南縣西門外題曰唐故朔方河東河西
隴右節度御史大夫贈兵部尚書太子太師清
源公王府君神道碑銘并序銀青光祿大夫守
中書侍郎同中書門下平章事集賢殿崇文館
大學士修國史潁川郡開國公元載撰金紫光

祿大夫門下侍郎同中書門下平章事太清太
微宮弘文崇玄館大學士上柱國齊國公王縉
書大歷十年四月

高力士殘碑 行書 大歷十二年五月

今在蒲城縣

無憂王寺真身寶塔碑 正書

今在鳳翔府法門寺碑首篆書大唐聖朝無憂
王寺大聖真身寶塔碑十五字題曰大唐聖朝
無憂王寺大聖真身寶塔碑銘并序徵事郎殿
中侍御史內供奉賜緋魚袋張彧撰大歷十三

年歲次戊午四月 丑朔廿五日立

贈揚州都督段行琛碑 正書

今在汧陽縣碑首篆書唐故段府君神道之碑
九字題曰唐贈揚州大都督段府君神道碑銘
并序朝議郎檢校尚書刑部員外郎 鳳翔少
尹侍御史賜緋魚袋張增書略云巨唐大歷己
未歲春正月段府君之子四鎮北庭涇原鄭穎
等州節度使開府儀同三司御史大夫張掖郡
王曰秀實追琢貞石光昭先考展孝思旌休烈
也君諱行琛字行琛曾門德濬初罹否運播遷

隴坻度地肯堂鬱為望姓在周辟奉朝請入隋
直文林館大父振握機未發早齡卒世考達府
君既齒鄉賦高標甲科簡修獨耀於錦衣從事
仍屈於黃綬天寶九載夏之季序遘疾於汧陽
御史里之第乙酉奄歸無物於斯七十五稔夫
人樂平狄氏吳山縣丞哲第六之女子祥頰
仲子秀成季子頰等稽謀宅兆明年春孟葵
於隴山東麓廣德二年秋九月乙未詔追贈府
君秘書省著作郎夫人太原縣太君大歷十年
夏五月詔加贈府君綏州刺史夫人太原郡太

夫人十三年季夏又贈府君揚州大都督夫人
忻國太夫人大歷十四年閏五月庚辰朔十三
日壬午建 郎行 府 縣尉李同系

篆額按唐書段秀實傳曾祖師濬仕為隴州刺
史留不歸今碑稱大父振是秀實之曾祖所謂
德濬者乃秀實之遠祖而非曾祖又以德為師
又碑稱初罹否運播遷隴坻疑是流徙於隴傳
稱為刺史不歸皆史之誤又秀實之祖達及父
行琛傳俱不載又秀實官開府儀同三司御史
大夫傳亦不載俱史之缺以段公忠烈而使其

世次缺繆可乎今碑已磨滅而世次尚隱隱可
讀故詳記之以備考

顏魯公與郭僕射書 行書

今在西安府儒學世謂之爭坐位帖

顏氏家廟碑 正書

今在西安府儒學碑首篆書顏氏家廟之碑題
曰唐故通議大夫行薛王友柱國贈秘書少監
國子祭酒太子少保顏君廟碑銘并序第七子
光祿大夫行吏部尚書充禮儀使上柱國魯郡
開國公真卿撰并書集賢學士李陽冰篆額建

中元年歲次庚申秋七月癸亥朔鐫畢八月己未真卿蒙恩遷太子少師冬十月壬子男碩封沂水縣男碩新泰縣男姪男頂承縣男頌費縣男頤鄒縣男微軀官階勲爵茲至二品子姪八人無功無能叨竊至此子孫敬之哉碑兩面并兩旁為四面左側旁一面銘內缺四字其碑陰之額正書高祖記室君國初居此宅睢州君舍人君侍馬堂今置廟地高祖妣殷夫人居十字街西北壁第一宅秘書監君禮部侍郎君侍馬睢州君居後堂華州君於堂中生焉今充神厨

少保君堂今充齋堂廳屋充亞獻終獻齋室凡
十行八十五字較碑字微小

碑題之下有記略云自唐室羅亂碑倒於野都
院孔目李延罷告知府郎中移於文廟乃命南
岳夢英大師秉筆書記其碑之右邊有篆書太
平興國七年八月二十九日重立李延罷記篆
書極佳蓋夢英筆也李延罷官甚微以移碑之
故附名不朽官斯土者踵而行之豈獨保全翰
墨已乎故余記金石每表而出之

顧炎武曰顏君廟碑銘乃真卿之父也其文曰

君諱惟貞字叔堅及叙其先世則曰魏有盛盛
字叔臺青徐二州刺史關內侯始自魯居于琅
邪臨沂孝悌里生廣陵太守葛繹貞子諱欽字
公若生汝陰太守護軍葛繹子諱默字靜伯
生晉侍中右光祿大夫西平靖侯諱含字弘都
隨元帝過江生侍中光祿勳西平定侯諱髦字
君道生州西曹騎都尉西平侯諱琳字文和生
宣城太守御史中丞諱靖之字茂宗生巴陵太
守度支校尉諱騰之字弘道生輔國江夏王叅
軍諱炳子字叔豹生齊侍書御史兼中丞諱覲

遠字見遠生梁鎮西記室叅軍諱協字子和生
北齊給事黃門侍郎侍詔文林館平原太守隋
東宮學士諱之推字介生皇秦王記室諱思魯
字孔歸君之曾祖也率子弟奉迎義旂于長春
宮拜儀同生勤禮字敬君之祖也著作郎修國
史夔州長史贈虢州刺史生昭甫本名顯甫敬仲殆
庶無恤少連務滋辟疆昭甫字周卿君之父也
高宗侍讀曹王屬贈華州刺史生我伯父諱元
孫君君生闕疑允南喬鄉真長幼與真卿允
咸自父以上竝直書其名而加諱字其他伯姊

羣後悉名之今人自述先人行狀而使他人填

諱非古也

顧氏引證甚詳節錄於此

又云文有云子泉弘都

之德行子泉即顏淵也避唐高祖諱

顏魯公奉使蔡州書 行書

今在同州府其下有魯公畫像

書曰真卿奉命來此事期未竟止緣忠勤無有

旋意然中心悵悵始終不改游於波濤宜得斯

報千百年間察真卿心者見此一事知我是行

亦是達於時命耳又曰人心無路見世事只天

知下有題曰觀此筆跡不顯歲月以事實考之

蓋使李希烈時也希烈以建中元年陷汝州盧
杞建議遣公奉使至正元宋諱貞元年八月丙
戌公不幸遇害困躓賊庭者二年及加於頸而
色不變度無還期誓不易節蓋書此以自表云
靖康元年七月壬申朝散郎秘閣修撰知同州
軍事唐重書

光祿卿王訓墓誌 正書

今在西安府城東十五里田家灣乾隆戊寅土
人取土得之題曰大唐故光祿卿王公墓誌并
序前秘書監嗣澤王漣撰并書略云公諱訓字

訓琅瑯臨沂人也永穆大長公主之中子曾祖
知道皇贈魏州刺史祖同皎皇光祿卿駙馬都
尉贈太子少保尚定安長公主父繇皇特進太
子詹事駙馬都尉贈太傅尚永穆長公主公春
秋卅一大歷二年己月癸巳奄終其年八月七
日遷厝萬年縣漣川鄉漣川原按唐史嗣澤王
漣附見上金傳不書其為秘書監定安公主暨
永穆公主傳載駙馬王同皎王繇皆不書其官
爵此誌均可以補史之缺至定安公主再嫁事
宜誌諱言之也

景教流行中國碑 正書

今在西安府西城外五里崇仁寺俗名金勝寺
碑首正書大秦景教流行中國碑九字題曰景
教流行中國碑并頌大秦寺僧景淨述大唐建
中二年歲在作噩太簇月七日大耀森文日建
朝議郎前行台州司士叅軍呂秀巖書碑下有
助檢校試太常卿賜紫袞袞寺主僧業利後有
番字其碑之兩旁皆有僧名及番字

不空和尚碑 正書

今在西安府儒學碑首正書唐大興善寺大德

大辯正廣智三藏國師之碑十六字題曰唐大興善寺大德大辯正廣智三藏法師碑銘并序
銀青光祿大夫御史大夫上柱國馮翊縣開國公嚴郢撰銀青光祿大夫彭王傳會稽縣開國公徐浩書法師諱不空西域人建中十二年歲次辛酉十一月乙卯十五日己巳建

吳岳祠堂記 于公異撰 冷朝陽行書 興元

二年十月

今在隴州吳嶽祠內

顧炎武曰按唐書是年五月二十八日副統帥

李晟復京師七月十三日德宗至自興元八月
晟至鳳翔斬叛卒王斌等及涇帥田希鑒此則
以其年之十一月告祭吳山而掌書記于公異
為此文也碑中所云相國涼公鎮鳳翔者李抱
玉也

李元諒懋公昭德頌 八分書

今在華州治大門內題曰大唐潼關鎮州軍隴
右節度使檢校尚書右僕射兼御史大夫華州
刺史武康郡王李公懋功昭德頌并序中大夫
行中書舍人上騎都尉昌平縣開國男張濛撰

朝散大夫守衛尉少卿淮陽縣開國男韓秀弼
書朝散大夫守宗正寺丞李彞篆額貞元五年
十月十一日建後有萬歷六年華州知州石友
麟重建其所云重建者不知碑毀重鐫抑碑倒
重立細玩碑字非明時新碑當是重立耳此乃
州人頌功碑也

顧炎武曰舊唐書李元諒傳元諒本名駱元光
嘗在潼關領軍積十數年軍士皆畏服德宗居
奉天賊泚遣偽將何望之輕騎襲華州刺史董
晉棄州走望之遂據城將聚兵以絕東道元諒

自潼關將所部乘其未設備徑攻望之遂拔華州望之走歸元諒乃修城隍器械召募不數日得兵萬餘人軍益振以功加御史中丞賊泚數遣兵來寇輒擊却之遷華州刺史兼御史大夫潼關防禦鎮國軍節度使與副元帥李晟進收京邑力戰壞苑垣而入遂復京師賜姓李改名元諒官終隴右節度使

雍州金石記卷九

唐

姜嫄公劉廟碑 正書

今在邠州城南廟中碑首姜嫄公劉之廟六字

題曰新廟碑

上四字缺

太中大夫行中書舍人上輕

車都尉賜紫金魚袋高郢撰節度巡官將作郎

試大理評事張誼書略云姜嫄公劉之廟舊制

卑陋湫隘在市邠寧節度觀察使撿校刑部尚

書兼御史大夫朗寧郡王張獻甫以貞元九年

十一月九日作新廟於南郭焉處士張綰篆額

碑已中斷多有殘缺金石文字記作貞元九年
四月今年月適在缺處

聖母帖 草書

今在西安府儒學前有正書唐釋懷素書五字
後有篆書元祐戊辰仲春模勒上石十字又後
有正書左拾遺裴休試大理評事柳乘鄉貢進
士柳槃大和四年十月十二日同登其文左旋
凡五行殊不可解

懷素藏真律公二帖 草書

今在西安府學藏真一則律公二則宋游師雄

刻石

草書千文

今在西安府儒學前有正書僧懷素三字後有
跋云唐釋懷素以草書鳴乃觀千文果是以信
今傳後間或毫釐有差特一時鐵筆未攻耳茲
用摹刻於石大明成化庚寅歲陝西右布政使
西蜀余子俊跋細玩跋語似前已刻石余子俊
又重摹上石跋語未詳言耳至書法較之聖母
帖亦覺微遜又此帖之下有宋克書杜少陵出
塞九首及宋克尺牘俱佳

同州澄城令鄭楚相德政碑 正書

今在本縣南門鄭公祠內碑首唐澄城縣令榮陽鄭公德政碑十二字題曰大唐同州澄城縣令鄭公德政碑銘并序司封郎中集賢殿學士缺二撰衛尉卿鄭雲逵書略云十一年秋閏八月 辛巳詔俞銘紀左馮掖澄城令鄭楚相功德于其理所之南門也澄人謂余

謀書殿飽循吏之事業聆采詩之風謠求成

其文寘義公政公

政公二字遠當斷處其字畫尚可以意求也此處不書諱

者以楚相之名已見於前也字林教鄭州滎陽人高祖元曹

皇朝 散大夫祠部郎中曾祖慈力皇朝議大
夫蔡州刺史祖敬賓梓州通泉丞考琨冀州南
宮尉公擢秀才第為東觀校書郎秩滿授長安
尉而至於宰是邑於是百姓孫士良等報德誠
明請命朝省而斯頌作焉左司郎中宇文邕修
功善狀守令白潛成立鄉貢進士姜元素篆額
貞元十四年正月廿五日建此碑已斷為二磨
滅甚多其世次及叙立碑之事猶隱約可辨金
石文字記云文多剝泐但云公字赫敖而不得
其名按文內詔俞銘紀澄城令鄭楚相功德是

鄭公名楚相矣其字舛教亦與名合以鄭楚相
之鄭字次行公字舛教之公字適當碑斷處顧
氏遂以為不得其名偶未檢耳果如顧氏之言
政公二字為鄭公所缺之諱則上文求成其文
寔義六字不成語矣况碑中有楚相二字分明
可辨非名而何此可信而無疑者余記金石每
於零落之餘偶有所得可以正史傳之缺謬闡
前人之未發為可喜也詳碑文澄人立碑乃請
於朝詔允而後行非若今人之私立多諛辭也
至今鄭公祠宇猶存碑無愧詞可以想見又碑

中多叙世次今人無之非古也按鄭雲達善分
書見金石錄

保唐寺燈幢贊 正書

今在西安府城南三里李家村內題曰保唐寺
毗沙門天王燈幢贊并序徵事郎前太子通事
舍人飛騎尉柳澈字方直纂并書元和七年壬
辰夏五月十五日壬申建

尊勝碑打本 正書

今在西安府儒學題曰佛頂尊勝陀羅尼沙門
不空奉詔譯大唐元和八年癸巳之歲八月辛

己卯五月乙酉女弟子邢羅延建尊勝碑打本
散施同願受持

大德塔銘 正書

今在西安府城南題曰唐故大德塔并序釋門
弟子文湜撰王抃清書略云和尚俗姓柳河東
人也目隨父任家寄鄭州出家洛陽元和十二
年八月八日坐化云云後列僧弟子三十餘人
石已磨滅幾不能讀和尚之名無由識也而小
楷書字畫近古故記之

劍州長史李廣業碑 正書

今在三原縣北五十里三家店碑首篆書唐故
劍州長史李府君神道碑十二字題曰唐故劍
州長史贈太僕少卿汝州刺史隴西李公神道
碑銘并序略云公諱廣業字

我景皇帝公

五代祖也隨海州刺史亮追封鄭王贈司空公
高祖也皇朝山東道行臺海州牧淮安王神通
公曾祖也皇朝左驍衛將軍淄川郡王孝同公
王父也皇朝雲麾將軍璿公之烈考也公釋褐
授寧州叅軍遷許州扶溝縣丞右羽林司階陝
王府典軍渭川別駕劍州長史開元十八年八

月二日終于劍州官舍春秋五十有一以其年
十二月遷祔先塋公之元子

當是
國貞皇戶部

尚書次子若水皇金吾衛大將軍公之元孫錡
即地官之冢嗣謂雲達嘗學舊史庶聞前修云

云貞元十年歲次甲申十一月壬申朔建

碑已磨滅其世次猶班班可考按此碑合孝同
碑考之其世次上自景皇以至於錡極為詳盡
可補史氏之闕至于孝同碑止稱淄川公今稱
淄川郡王存之以俟考

趙峒曰王元美謂書撰人皆不可考今碑中有

云謂雲達學舊史而前署撰者官刑部侍郎當是鄭雲達攷雲達正與李錡同時撰文無疑但碑又云上柱國原武縣開國男雲達傳不及或史略之耳書者則誠不可考

楚金禪師碑 正書

今在西安府儒學顏魯公多寶碑陰碑首篆書唐國師謚大圓禪師碑九字題曰唐國師千福寺多寶塔院故法華楚金禪師碑紫閣山草堂寺沙門飛錫撰政議大夫行中書舍人翰林學士上柱國東海男賜紫金魚袋吳通微書後附

奉勅追謚號記貞元廿一年歲在乙酉七月戊辰朔廿五日壬辰建

內侍李輔光墓誌 正書

今在高陵縣題曰唐故興元元從正議大夫行內侍省內侍李公墓誌銘朝議郎行尚書刑部員外郎崔元略謨宣德郎前晉州司法叅軍巨雅書略云公諱輔光字君肅涇陽人曾祖望華原縣令祖萬靖涇王府長史父思翌涇州仁賢府左果毅賞緋魚袋公即果毅之第三子也德宗御宇時以內臣縱敗公特以良曹入侍門吏

晉州司法叅軍巨雅以元略長兄嘗賓於北府
以元略又從事中都俱飽內侍之德見託為誌
勒之貞石按書人巨雅乃崔元略之兄以弟已
書姓於前故止書名耳石墨鐫華金石文字記
俱作巨雅書是以巨雅為姓名不知其為崔姓
誤矣細讀墓誌當自得之

趙嶠曰葬在咸陽東北近涇萬歷中涇岸崩壅
水不流三日乃得茲石其銘曰水竭原遷斯文
乃傳可謂奇矣

顧炎武曰文稱門吏司法叅軍巨雅此輔光為

河中監軍所除唐士人而出於內侍之門者蓋不少矣輔光少選入內而有夫人輔氏子四人唐之宦官有權位者則得娶婦史之所載高力士娶呂玄晤女李輔國娶元擢女皆奉勅為之而楊復光至假子數十人

邠國公功德銘 正書

今在西安府儒學碑首已失題曰邠國公功德銘右神策軍護軍中尉副使兼右街功德副使雲麾將軍右監門衛將軍員外置同正員上柱國弘農開國侯食邑一千五百戶楊承和撰朝

議郎權知撫州長史上柱國賜紫金魚袋翰林
侍詔陸丕篆額略云右街功德使驃騎大將軍
行右武衛上將軍知內侍省事上柱國邠國公
食邑三千戶充右神策軍護軍中尉安定梁公
曰守謙貞元十二年遇蔡人逆戎命公撫衆討
錫有加伏以元和長慶釋教大興謹於大興唐
寺花院為國寫古今翻譯大小乘經論戒律
合五千三百廿七卷嘗求善書者令絕外塵不
飲茹浴身至於精刹焚香而就筆硯又立經堂
一所又於堂內造轉輪經藏一所遂命戎副楊

承和文而書之辭不敢當公不聽又辭公又不
聽流汗如沐愧顏若丹輒盡野辭書於琬琰長
慶二年十二月一日立按楊承和以士人而為
宦者作文書碑著其二次辭語幾二百言可謂
不知耻矣抑亦自憚微詞耶

都穆金薤琳琅曰邠國公者內侍梁守謙也考
之唐史宦者守謙無傳惟憲宗元和十五年書
帝暴崩於太極殿中尉梁守謙王守澄等共立
太子殺吐突承璀及愷王惲而韓文公平淮西
碑亦載守謙在帝左右嘗命之往撫蔡師夫守

謙以一宦者而爵至上公此可見憲宗之信任
小人宜其晚節不終卒死宦者之手然則予之
錄此蓋將為天下後世之戒而非徒取其文字
也

西平郡王李晟碑 正書

今在高陵縣碑首篆書唐故太尉兼中書令西
平郡王贈太師李公神道碑題曰唐故太尉兼
中書令西平郡王贈太師李公神道碑銘并序
特進爵司空兼門下侍郎同中書門下平章事
充集賢殿大學士上柱國晉國公臣裴度奉勅

撰朝散大夫守尚書庫部郎中翰林侍書學士
上柱國賜紫金魚袋臣柳公權奉勅書并篆額
略云公諱晟字良器其先隴西也後徙京兆曾
祖嵩皇岷州刺史贈洮州刺史祖思恭皇洮州
刺史贈幽州大都督考欽皇左金吾衛大將軍
隴右節度經略副使贈太子太保公多好學乾
元初嘗客武都值酋豪以缺守遘亂公與所從
十數馳而射之殪其為魁者狀聞拜左清道率
歷二府右職累遷至光祿太常卿以上世次及
容武都事可
以補史之缺其餘碑與傳不合者錄
石墨鐫華述都玄敬之言不再記太和三年

次己酉四月庚戌朔六日乙卯建

趙嶠曰都玄敬錄其官時與史不合者極詳今
抄於左碑謂晟由左清道率歷二府右職累遷
至光祿太常卿傳則云授特進太常卿碑謂晟
為涇原四鎮北庭節度都知兵馬使代宗徵之
以左金吾大將軍為神策軍兵馬使傳則云以
右金吾衛大將軍為涇原四鎮北庭兵馬使碑
謂晟平蜀還授檢校太子賓客而傳不書碑建
中二年以晟為神策先鋒都知兵馬使加御史
中丞尋拜左散騎常侍兼御史大夫傳則云晟

為神策先鋒加檢校左散騎常侍兼魏府左司馬尋授御史大夫碑謂皇居失守授晟檢校工部尚書充神策行營節度使傳則云詔拜神策行營節度使碑謂大駕再遷加檢校右僕射尋轉左僕射同平章事兼京兆尹神策軍京畿鄜坊節度觀察等使管內及商華等州副元帥傳則云進晟尚書左僕射同中書門下平章事復詔晟兼河中晉絳慈隰節度使又兼京畿渭北鄜坊丹延節度招討使又進京畿渭北商華兵馬副元帥碑謂鸞爰歸拜司徒兼中書令俄以

本官兼鳳翔尹鳳翔隴右節度觀察等使及四
鎮北庭涇原等州副元帥改封西平郡王傳則
云拜晟司徒兼中書令尋拜鳳翔隴右涇原節
度使兼行營副元帥徙王西平郡晟之碑作於
當時而史成於後代要當以碑為是又碑所記
公十二子史云十五子亦當從碑

魏公先廟碑 正書

今在陝西布政司二門內近出於土中裂而為
五僅存七百餘字斷續不復成文可讀者有云
博陵縣開國子食邑五百戶賜紫金魚袋崔

下缺

此為河東郡開國公食邑二千戶柳公權書并
篆額有云特進侍中贈太尉鄭國文貞公魏氏
在貞觀立家廟於長安昌樂里云云細繹碑文
當是文貞公家廟其子孫修之為建此碑以文
貞廟碑又為誠懸所書所宜護惜者也

佛頂尊勝陀羅尼經并序 正書

今在西安城南五十里百塔寺內幢先書序次
書經後書奉行佛頂尊勝陀羅尼經後幢銘內供
奉僧叡川文白閣僧無可書大唐大和六年四
月十日建

義陽郡王苻璘碑 正書

今在富平縣儒學題曰唐故輔國大將軍行左
神策軍將軍知軍事檢校右散騎常侍兼御史
大夫食邑 百戶贈越州都督刑部尚書

苻公神道碑銘并序銀青光祿大夫守中書侍
郎同中書門下平章事充集賢殿大學士上柱
國 開國侯食邑一千戶李宗閔撰翰林
學士承旨兼侍書朝議大夫守尚書工部侍郎
知制誥河東縣開國男食邑三百戶柳公權書
略云公諱璘字元亮其先琅邪人曾祖諱 媯

州刺史大父諱暉游擊將軍相王府左事典

率贈青州刺史烈考諱令奇昭義軍節度副使

試太常卿開府儀同三司琅邪郡公贈部尚

書左僕射公實僕射長子公與先公俱為薊裨

將薊亂同奔於潞潞帥薛嵩為軍副嵩卒其

地分移隸於魏魏帥田承嗣知公父子有才略

各以右職處之承嗣死子悅代為帥謀不軌以下

碑與史合惟詳畧易耳公於是率所部降燧署為軍副以

聞詔授特進試太子詹事兼御史中丞封義陽

郡王實封百戶先公從容就義視死如歸燧復

列上其事德宗皇帝嘉而悼之詔公起復加左
散騎常侍兼御史大夫晉陽第一區祁縣田三
十頃贈先公戶部尚書貞元元年李懷光反公
為燧腹心之將將兵五千先濟河與西師合勢
據要同收長春宮懷光平二年西蕃寇邊公以
偏師擊虜三年從燧入覲擢拜輔國大將軍行
左神策軍將軍知軍事賜靖恭里第一區藍田
田十頃初先公罹魏禍太夫人潛匿以免及悅
死詔迎于魏加號鄧國夫人賜宴別殿上又思
公之忠烈再贈左僕射公之弟琳授檢校太子

賓客琅琊郡公瑤授忻州別駕琅琊縣男皆號
開府分領禁職以貞元十四年七月廿四日終
於靖恭里第享年六十有五贈越州都督其年
黃鐘月庚申日葬於富平從先僕射之兆夫人
馮氏封長樂郡夫人祔焉有子四人曰濟曰

曰澤澈前為邠寧節度使後為河東節度
使太原尹北都留守檢校兵部尚書御史大夫
琅琊郡開國侯食邑一千戶罷實封一百戶今
上元年再贈公刑部尚書夫人長樂郡太夫人
從子貴也按符璘見令奇傳中今碑與史合者

不錄錄者皆與史有小異及史之缺以符氏父子忠孝史略而不詳故備錄之考古者當自得焉又碑稱有子四人其二三字已殘缺其後有澈前為邠寧節度使視缺處筆書疑為第二子碑已磨滅驟讀之幾不能辨所當亟為表彰也金石錄云題中書侍郎同平章事李宗閔撰宗閔太和七年為此官

梓州刺史馮宿碑 正書

今在西安府儒學碑首篆書大唐故劍州東川節度使贈吏部尚書馮公神道碑二十字題曰

大唐故銀青光祿大夫檢校禮部尚書使持節梓州諸軍事兼梓州刺史御史大夫充劍南東川節度副大使知節度事內觀察處置靜軍等使上柱國長樂縣開國公食邑一千五百戶贈吏部尚書馮公神道碑銘并序銀青光祿大夫工部尚書皇太子侍讀兼判太常卿事上柱國晉陽縣開國子食邑五百戶王起撰翰林學士朝議大夫守諫議大夫知制誥上柱國河東縣開國男賜紫金魚袋柳公權書并篆額略云開成元年十二月三日檢校禮部尚書東川節

度使長樂公享年七十薨於位天子不視朝一日贈以天官之秩其明年五月葬於京兆萬年縣白鹿原先人之塋公諱宿字拱之冀州長樂人五代祖周烏氏侯諱早惠 隋隰州司戶皇朝為婺州長山令長山生高祖皇婺州記曹掾諱文儉記曹生曾祖茂才高弟枯州松陽令諱遵儀松陽生大父文林郎宋王府記室叅軍贈禮部員外郎諱嗣員外生先府君南昌令新安郡長史贈尚書左僕射諱子華公即僕射之元子也弱冠以工文碩學稱年廿六舉進士是時

明有司即兵部侍郎陸公贄又應宏詞科試百
步穿楊賦其文至今諷之後生以為楷歷比部
郎中為持權者所忌會韓文公愈以京師迎佛
骨上疏切諫忌公者曰上之怒也誣公實為之
出刺歙州云云按馮宿唐史無傳不能備考又
此碑後半已磨滅不可辨未得詳記為可惜也

雍州金石記卷十

唐

國子學石經

周易二萬四千四百三十七字九石

尚書二萬七千一百三十四字十石

毛詩四萬八百四十八字十六石

周禮四萬九千五百一十六字十七石

儀禮五萬七千一百一十一字二十石

禮記九萬八千九百九十四字三十三石

春秋左氏傳一十九萬八千九百四十五字十六石

石七

公羊傳四萬四千七百四十八字十七石

穀梁傳四萬二千八十九字十六石

孝經二千一百三十三字一石

論語一萬六千五百九十九字七石

爾雅一萬七百九十一字五石

五經文字三卷凡一百六十部三千二百三十

五字

九經字樣一卷凡七十六部四百二十一字合

經文字
十石

九經并孝經論語爾雅字樣等都計六十五萬
二百五十二字

今在西安府儒學其末有年月一行題名十行
曰開成二年丁巳歲月次於亥目惟丁亥書石
學生前四門館明經臣艾居晦書石學生前四
門館明經臣陳玠書石學生前文學館明經臣
書石官將仕郎守潤州句容縣尉臣
段絳校勘兼看書上石官將仕郎守秘書省正
字臣栢曷校勘兼看書上石官將仕郎守四門
助教臣陳莊士覆定字體官翰林待詔朝議郎

權知鴻王友上柱國賜緋魚袋臣唐玄度校勘
官兼專知都勘定經書檢校刊勒上石朝議郎
守國子毛詩博士上柱國臣章師道朝散大夫
守國子司業騎都尉賜緋魚袋臣楊敬之都檢
校官銀青光祿大夫

國子祭酒同中書門下平章事太清宮使監修
國史上柱國滎陽郡開國公食邑二千戶臣覃

金石文字記云官銜缺十字九經字樣云
右僕射兼門下侍郎國子祭酒平章事覃

顧炎武曰按舊唐書開成二年正月中書門下
奏起居舍人集賢殿學士周墀監察御史張次

宗禮部員外郎孔溫業兵部員外郎集賢殿直
學士崔球等同勘校經典釋文又云令率更令
韓泉充詳定石經官新唐書亦列堦等四人而
碑並不載

又曰舊唐書文宗紀開成二年宰臣判國子祭
酒鄭覃進石壁九經一百六十卷時上好文覃
以經義啟導稍折文學之士遂奏置五經博士
依漢蔡邕刊碑列於太學創立石壁九經諸儒
較正訛謬上又令翰林勘字官唐玄度復校字
體又乖師法故石經立後數十年名儒皆不窺

之以為蕪累甚矣舊史之評如此愚初讀而疑之又見新書無貶辭以為石壁九經雖不逮古人亦何遽不賢于寺碑冢碣及得其本而詳校之乃知經中之繆戾非一而劉昫之言不誣也按顧氏所指經中脫誤字極多茲不重記

又曰凡經中缺筆皆避唐諱成城字皆缺末筆穀梁襄昭定哀四公卷儀禮士昏禮皆然此為朱梁所補刻考之宋劉後又黎持二記但言韓建劉鄩移石而不言補刻然成字缺筆其為梁諱無疑昔人固未嘗徧讀而博考也按朱全忠

父名誠

五經文字三卷前刊張叅原序略云十年夏六月
有司以職事之病上言其狀詔委國子儒官檢
校經本送尚書省叅幸承詔旨得與二三儒者
分經鈎考而共決之互發字義卒以所刊書於
屋壁經典之文六十餘萬既字帶惑體音非一
讀學者傳授義有所存離之若有失合之則難
並至當之餘但朱發其旁而已猶慮歲月滋久
官曹代易儻復蕪汙失其本真乃命孝廉生顏
傳經收集疑文互體受法師儒以為定例凡一

百六十部三千二百三十五字分為三卷大歷

十一年六月七日司業張參序

此大歷中張參所為書于辟間

其序與劉禹錫國學新修五經辨記合開成時與十二經同刻於石者

乾符三年

孫毛詩博士自牧以家本重校勘定七月十八

日書刻字人魚宗會

此開成中既刊石經并五經文字及九經字樣孫自

牧以家藏之本於乾符時勘定五經文字改正錯誤故又題於後

金石文字記

云疑為開成中所刻其中有磨改數字意自牧

所為得之矣

九經字樣一卷前刊國子奏覆定五經字體官翰

侍詔唐玄度狀准太和七年十二月五日勅覆

定九經字體者今所詳覆多依司業張參五經
文字為準諸經之中別有疑缺舊字樣未載者
今校勘官同商校是非取其適中纂錄為新加
九經字樣一卷請附於五經字樣之末奉勅宜
依開成二年八月十二日中書門下牒序略云
新加九經字樣一卷凡七十六部四百二十一
字按書史會要唐立度精於小學動不離規矩
至於推原字畫使有指歸作九經字樣辨証繆
誤古今繩墨蓋亦無遺其疎放縱逸則非所長
今觀所書狀序信然

按元祐五年黎持新移石經記云舊在本務坊自天祐中韓建築新城而石經委棄于野至朱梁時劉鄩守長安從幕吏尹玉羽之請輦入城中置於此地即唐尚書省之西隅也今龍圖呂公領漕陝右以其處窪下命徙置於府學之北墉而建亭焉今西安府學之東偏中建大亭置唐玄宗所書孝經今謂之孝經臺備極雄偉其北構屋數十間東西廊各數間置石經于其中又于孝經臺北石經前架屋數十間置種種舊碑如聖教序記之類為石墨淵數謂之碑林俗

呼碑洞云

慈恩寺法師基公塔銘 正書

今在西安府城南四十里興教寺玄奘法師塔
之右題曰大慈恩寺大法師基公塔銘并序朝
散大夫檢校太子左庶子使持節金州諸軍事
守金州刺史兼御史中丞輕騎都尉賜紫金魚
袋李弘慶撰略云法師以永淳元年仲冬卒於
慈恩寺陪葬於玄奘法師塔太和二年舊摧圯
法師義林奏葺舊塔起新塔師姓尉遲諱基字
弘道其先朔州人先考宗松州都督伯父鄴國

公法師性敏悟玄奘請於鄂公奏報許之時年
一十七脫儒服云云安國寺內供奉講論大德
建初書開成四年五月十六日講論沙門令檢
修建

大遍覺法師玄奘塔銘 行書

今在西安府城南四十里興教寺題曰大唐三
藏大遍覺法師塔銘并序朝議郎檢校尚書屯
田郎中使持節洛州諸軍事守洛州刺史兼侍
御史上柱國賜緋魚袋劉軻撰三藏諱玄奘俗
姓陳安國寺內供奉講論沙門建初書開成四

年五月十六日馮翊沙門令檢修建此修塔銘也文多不錄

趙嶠曰據史卒於顯慶六年即龍朔元年銘則云卒於麟德元年之二月史云年五十六銘云年六十九

寂照和上碑 正書

今在咸陽縣城安國寺碑首篆書唐故安國寺寂照和上碑九字題曰大唐安國寺故內外臨壇大德寂照和上碑銘并序宣德郎守秘書省著作郎充集賢殿修撰上柱國段成式纂大德

號寂照字法廣俗龐氏京兆興平人元和三年
住安國寺自長慶中寶歷末太和初皆駕幸安
國寺太和七年季冬病化於寺少華山樹谷僧
無可書處士顧玄篆額按金石文字記作開成
六年正月細閱碑中無開成字不知何據

趙崑曰此碑在咸陽西馬跑泉地中武功康子
秀先生過而識之鑒於道傍其后王咸陽移之
咸陽城中佛寺以碑有安國寺字遂改其寺為
安國子秀名榕太史德涵子也

大達法師玄秘塔碑銘 正書

今在西安府儒學碑首篆書唐故左街僧錄大
達法師碑銘十二字題曰唐故左街僧錄內供
奉三教談論引駕大德安國寺上座賜紫大達
法師玄秘塔碑銘并序 南西道都團練觀察
處置等使朝散大夫兼御史中丞上柱國賜紫
金魚袋裴休撰 議大夫守右散騎常侍充集
賢殿學士兼判院事上柱國賜紫金魚袋柳公
權書并篆額會昌元年十二月十八日建
碑陰有勅莊宅使牒及比正言疏有云萬年
縣澹川鄉陳村安國寺金經 壹所大中六年

四月廿五日

陀羅尼神咒石幢 正書

今在西安府儒學題減數字有云陀羅尼神咒
凡二百七十八句其末有已前是根本咒六字
又有一切佛心咒凡十四句又一切佛心印咒
凡三句又灌頂咒凡七句又灌頂印咒凡六句
結戒咒凡六句心咒凡六句心中心咒凡六句
佛頂尊勝陀羅尼咒凡三十六句無礙大悲心
陀羅尼經咒凡七十餘句其後有記漫減不可
識大中二年己巳歲正月丙辰朔建

周公祠靈泉碑 正書

今在岐山縣周公廟碑無額題曰鳳翔府岐山縣栖鳳鄉周公廟靈泉碑并題奏狀及勅批荅大中二年十二月廿日鳳翔隴州節度觀察處置等使銀青光祿大夫檢校尚書右僕射鳳翔尹御史大夫安平郡開國公食邑二千戶臣崔珙狀奏

杜順和尚行記 行書

今在西安府城內東北隅開福寺內題曰大唐華嚴寺杜順和尚行記鄉貢進士杜殷撰朝議

郎試左武衛長史上柱國董景仁書大中六年
月二十四日記按華嚴寺志稱在城南三十
五里有杜順和尚墓塔明為開福寺今寺在城
中東北隅棟宇弘壯為城中偉觀碑在佛殿前
存之以俟考又石墨鐫華金石文字記俱作開
佛寺誤

圭峯定慧禪師傳法碑 正書

今在鄠縣草堂寺碑首篆書唐故圭峰定慧禪
師碑九字題曰唐故圭峰定慧禪師傳法碑并
序紫金光祿大夫守中書侍郎兼戶部尚書同

中書門下平章事充集賢殿大學士裴休撰并
書紫光祿大夫守工部尚書上柱國河東郡
開國公柳公權篆額圭峰禪師號宗密姓何氏
大中九年十月十三日建碑陰多宋人題名

郎官題名石柱 正書

今在西安府學宮門內形如石幢高八尺餘凡
八面面各三層或四層首書吏部郎中為第一
層其第一層之末為記有大中十一年十一月
十二日書鐫上石柱記其下僅空二字有左司
郎中唐汝六字疑石柱記為唐汝所書不然此

層書記之下空處尚多不應止書一人況石柱
每一層書官之字稍大其後有百餘人不應止
書一官一名漫無區別也石柱有三面皆磨滅
不能辨餘亦殘缺石墨鐫華記之甚詳或其時
尚可識也今錄於左

趙嶠曰柱八面曰左司郎中曰左司員外郎曰
吏部郎中曰吏部員外郎曰司封郎中曰司封
員外郎曰司勳郎中曰司勳員外郎曰考功郎
中曰考功員外郎曰戶部郎中曰戶部員外郎
曰度支郎中曰度支員外郎曰金部郎中曰金

部員外郎曰倉部郎中曰倉部員外郎曰禮部
郎中曰禮部員外郎曰祠部郎中曰祠部員外
郎曰膳部郎中曰膳部員外郎曰主客郎中曰
主客員外郎按唐制二十四司以尚書左右丞
領之左右司為之副此皆左丞之屬也題名不
及左丞者自五品以下也十二司各百餘人

按宋張舜民畫墁錄云長安今府宇即唐尚書
省也府院即吏部也府錄廳前石幢即郎官題
名石也張長史書序云云金石文字記及王阮
亭分甘餘話皆述之今細考石幢之記已漫滅

無一字可識其年月之下有唐拔名宸為疑竇
按集古錄載有郎官石記下注云歲月缺右唐
右司員外郎陳九言撰張旭書此本止其序爾
云云考此石柱即張旭所書則年月尚存集古
錄不應書缺且題名者皆左司之官不應倩右
司之陳九言撰記以臆度之集古錄張旭所書
石記當另為一石今董文敏戲鴻堂所刊長史
石記有為開元廿九年更為信而可徵畫墁錄
未及分晰言之其後張書之石已失而今存之
石已不可讀遂混而為一鄙意若此未知果然

否耶又金石文字記有司直廳石幢覓之了不可得惜未能一證之也

滌河石幢 正書

今在西安府城外滌河濱近河水冲決出於土中幢書陀羅尼經佛弟子彭城郡夫人為亡夫造尊勝幢一所大唐咸通二年辛巳歲八月廿五日建於萬年縣滌川鄉鄭村又石幢一同時出於土中僅書陀羅尼經無年月書法相類故并記之

琅琊王氏夫人墓誌銘 正書

今在西安府城西五里金勝寺內石如幢高二尺餘前書梵咒後書誌銘云夫人即放玉冊官內供奉賜緋魚袋強瓊妻夫人年七十七乾符元年十二月廿二日疾終此石近出土中寺僧以為井床今令搨工移於寺內

內侍吳承公墓誌 行書

今在西安府城十五里田家灣姜篆書

內樞密使吳公墓誌銘十二字題曰大唐故內樞密使特進左領軍衛上將軍知內侍省事上柱國南陽郡開國侯食邑一千戶食實封一百

戶吳公墓誌并序翰林學士朝議郎守尚書司
封郎中知制誥 柱國賜紫金魚袋裴廷裕撰
翰林待詔朝散大夫檢校右散騎常侍守蜀王
傅兼御史大夫柱國賜紫金魚袋姓不辨書略云
公諱承必字希白乾寧二年正月二十日薨十
一月二十日葬於萬年縣澧水鄉北姚村云云
御史大夫上柱國賜紫金魚袋董壞篆蓋誌石
已磨滅驟視幾不能讀書法極精以字小而瘦
故尤覺漫滅耳

僧彥脩草書

今在西安府儒學碑二面每面作三層其後有
正書跋云乾化中僧彥脩善草書筆力適勁得
張旭法惜哉名不振于時遂命模刻以昭同好
嘉祐戊戌歲十月九日司農少卿知解梁郡李
邕緒題

張旭肚痛帖

今在西安府儒學草書凡六行前有正書張旭
書三字此帖在僧彥脩草書碑之下方想亦於
宋時模勒上石故附記於此

重脩法門寺塔廟記

正書

今在鳳翔府寺中呼首篆書大唐秦王重脩真
身塔寺之碑十二字題曰大唐秦王重脩塔廟
記朝請大夫守尚書禮部郎中柱國賜紫金魚
袋薛昌序撰天祐十九年歲次壬午二月壬子
朔二十六日丁丑記承旨王仁恭書

顧炎武曰通鑑後唐莊宗同光二年封岐王李
茂貞為秦王今此碑天祐十九年建而其文已
稱秦王則在同光之前二年矣蓋必茂貞所自
稱又史言茂貞奉天祐年號此碑之末亦書天
祐十九年而篇中歷述前事則並以天復紀年

至天復二十年止亦與史不合

三階禪師碑額 正書

今在西安府城南三里薦福寺內額正書皇唐三階大德禪師碑九字碑文已失額存寺內以唐時物記而存之

尊勝陀羅尼經咒石鼓 正書

今在醴泉縣北二十里趙村廣濟寺石鼓高三尺圍一丈四尺中空厚尺許粗有鼓形週刻陀羅尼經咒大半磨滅隱隱微有字痕而已可識者六百餘字下座高三尺餘圍與鼓同亦中空

作天王神鬼頂戴狀駁蝕有古致鼓無書者姓
氏及年月第寺建於唐且趙村以石鼓名里其
為唐時物無疑也置鼓於臺以亭覆之石黑鐫
華云疑是唐初時建寺寺僧不知護持鼓下為
溷廁今且安置莊嚴矣

雍州金石記餘

房梁公碑

房梁公玄齡碑余在醴泉時嘗至碑下雖已磨泐尚存六百餘字字畫如新以磨滅處乃村氓椎鑿所損非若皇甫君九成宮諸碑日事椎搗所存不過形似也近聞此碑已為鄉人所毀了無一字可識矣碑為褚公所書書法最精在慈恩同州聖教序記之上可惜也

西嶽頌

隴州吳山今之西鎮漢之西嶽也山去州治六十

里其上有西嶽頌即五瑞圖漢時碑也墨客褚千
峰作金石經眼錄載之余嘗令搨工至隴適有虎
患及隴而返至今往來於懷無由暫釋也

花塔寺

嘗閱顧寧人金石文字記有花塔寺種種造佛記
讚心竊慕之至西安即日訪焉寺在南門內向名
寶慶寺以寺中塔嘗以五彩塗之俗呼花塔寺寺
已頽落於佛座下覓之了不可得至殿之後簷有
石佛砌簷下座下得記銘三種喜之不勝以顧記
尚夥遍覓之無有也久之重至西安訪之又於後

殿之前檐得銘記三種亦在石佛座下以初至時
其下積薪今薪徙而記見也因思尚有花室銘或
在簷右為土脰所掩徘徊久之而返又歲餘再過
其地土脰移而花室銘見矣銘為緡國公揚花臺
銘顧氏所記微誤已詳記中矣詢之寺僧云石佛
舊在塔上塔圯不復安塔中故置此耳仰瞻塔上
尚有石佛命工鈎梯而上又得王璿石龕阿彌陀
像銘及梁義深等九人題名寺內幾無遺刻向非
再三求之所遺多矣

蒼頡碑

蒼頡碑在白水縣有漢碑一再三求之弗得癸未
歲於闕鄉遇張進士建章為蒲城人詢其所居去
白水不三四十里乃囑其榻以遺余張君歸時親
至其地訪之碑下方上銳有穿一高四尺七寸寬
二尺四寸凡九百餘字皆磨滅不可讀有天生德
於大聖四目靈光熹平年等字可識碑陰及右側
皆磨泐左側有永壽二年延禧四年二百餘字可
識此碑故在墓前宋時移於廟中以其地無榻工
詳錄碑字遺余考鄭漁仲金石略蒼頡廟碑光和
二年又三年未詳又云蒼頡廟人名碑延熹五年

未詳又集古錄作漢碑陰題名蓮勺左鄉有秩池
陽左鄉有秩金石錄以為蒼頡人名皆此碑也今
張君所錄亦有蓮勺等名以無搨本未入記中附
記於此又廟壁有蒼頡所書二十八字考周末時
於蒼頡墓下得所書二十八歲之書府其後摹入
淳化閣帖中又不知何時刊碑於廟其字與閣帖
同

萬年宮碑陰

唐書高宗永徽二年改九成宮為萬年宮冊府元
龜永徽五年五月制萬年宮銘刻石於永光門外

仍令中書門下及文武三品已上自書名位於碑陰刻之其書凡三層字大小不一皆有可觀即武臣所書殊非潦草可想見當時書法之盛余歸里時攜至漢江為水所淹惜不得盡記之至今悵悵也

李靖李世勣碑陰

李景武公靖李貞武公世勣墓俱在醴泉縣其碑陰有宋游師雄跋趙子函遊九峻山記自言親至墓上觀諸碑余謁昭陵遙觀陪墓諸墓及碑碣驗之趙記一一皆合絕無妄語而景武貞武二碑其

陰有跋未之見也苟見之固宜載之記中况游跋
書法甚佳髣髴似東坡筆子函亦收宋碑寧肯棄
之耶訪古者不得輒誇親至所當一過再過耳

田真人等碑

富平縣美原鎮有田真人碑模王右軍書又富平
之六井有石幢康玠行書土人皆禁推搦云搦之
輒雨雹求之久而未得以語車聘岩曰易耳未幾
攜二紙而來云於夜間搦得人固弗知雹亦無有
愚人之惑皆此類也

石刻孟子

唐石刻九經之外有玄宗八分書孝經又論語爾雅亦書石學生所書明時刻孟子於石合西安府學中共十三經云

魏徵仆碑

魏文貞公徵墓在醴泉縣昭陵南十里鳳凰山巖墓前有仆碑其陰向上余嘗偕張君拱端令人剔去碑下土以手摩娑若未刻者按唐書太宗仆魏徵碑想當仆時磨去其文耳考韓昌黎所為平淮西碑憲宗旋命仆之李商隱韓碑詩有粗砂大石相磨治句是仆碑必磨其文唐制或然也

乾陵碑

唐高宗乾陵在乾州北十里梁山武后亦祔焉規模宏壯窮極侈麗陵左碑高三丈厚六尺餘濶幾一丈碑側鐫龍鳳形其面及陰俱無字俗所謂無字碑也有金都統經略郎君行記女直字後有譯書其右碑四方若棋局面各五尺高四尺計七節每節一石渾成層累而上有蓋有座合高三丈餘今已仆七石猶存按金石錄述聖紀碑文武后製中宗書乾志稱所刻字以金嵌之余親至陵上抉剔苔蘚未見字跡豈碑字適在土中耶碑石甚巨

非百人不能扶而起之為之歎息而已石墨鐫華
云唐述聖紀碑今倒仆折為數段止存兩段蓋水
知碑有七節且存亦不止兩段也

上西嶽書碑

西嶽廟舊有李靖上西嶽書碑詞極荒誕蓋曰隋
唐佳話有魏公困於貧賤過華山廟祈於神辭色
抗厲之語好事者遂為此不經之詞以厚誣魏公
耳朱竹垞曝書亭集嘗辨其偽華陰令姚君遠翻
埋其碑著說於石可謂有識碑字亦佳王元美嘗
稱之今姚君去華碑又出於土中以搨而售之較

易於他碑也

西嶽祠殘碑

西嶽廟門內稍西有巨石一座石形微方每面丈餘高亦如之其上復有小石三四其下有座高三尺餘皆竒古可玩余嘗謁祠徘徊石旁不能去老人為余言此唐明皇所製碑也高五丈餘黃巢入關以火焚之故崩頽若此向使此碑無恙可為秦中石墨之冠也

溫泉池石

溫泉在臨潼縣城南驪山之陰俗所謂太子塘者

堂室精潔注水入池淙淙可聽清澈見底浴之溫
煖如意亦大地之奇也其池梵之以石上廣而下
窄坐下層則胸以下溶溶在水中池面之石每長
二尺許廣一尺厚亦如之四圍周砌正側二面悉
有刻字字大六七分皆漫滅不可識幾於摩娑石
鼓詢之執役者云尚有可識者以不知書故不能
言此古時物不能究其自来也此石每面書字自
右而左其側亦然式如法帖其為驪山古物出諸
名手無疑兩面皆刻則砌內亦有刻無疑以在邃
屋與堂未為人所拂拭耳昔蘭亭石刻為厨人鎮

肉淳化木刻為馬槽自古為然而茲石置之穢穢
之地為不幸也存以俟好古君子

西岳題名殘碑

西岳祠灝靈樓俗稱五鳳樓樓下中為石闕三左
右各一其石闕下砌石中有唐人題名甚夥漫滅
不可識者更多其題名有橫書者似本為石闕之
石題名於上曰經重砌故顛倒不倫耳其題名有
直書而橫砌於內者此必古碑本祠如精享述聖
諸碑兩旁皆有題名直書而下故茲直書之題名
石為漢唐古碑無疑安知漢郭香察書之碑不在

內耶今時固宜仍舊或有更置修葺時所當一為
檢點耳姑記之以告來者

條子聖教序

明秦藩以懷仁集王右軍書聖教序記并心經舊
搨之佳者重摩上石其書橫列如法帖世謂之條
子聖教序石在西安府城東關帝廟內碑字絕佳
以懷仁本已磨泐此獨完好墨客書賈以古紙搨
之充唐宋舊搨多獲善價第此碑每行十字懷仁
本每行盡處多在秦藩本每行中連處作偽者能
使連者斷不能使斷者連也細察當自知之又聖

教後有摹蘭亭記亦佳

溫泉碑

後魏溫泉碑在驪山下搨工云十年前曾搨之今不知其處矣為時不遠尚可踪迹求之也

常醜奴李使君碑

隋常醜奴碑在興平縣崇寧寺內余孺友入至寺覓之不可得矣又隋安喜公李使君碑在乾州今亡矣

石幢

唐人於佛寺建石幢書陀羅尼經咒幾於美不勝

收其書之佳者已一一記之矣外此醴泉縣新時寺有石幢小楷書西安府城卧龍寺佛殿前石幢僅半段高二尺餘蠅頭小楷有乾寧年及女弟子某氏建等字書法甚佳又開元寺有石幢二又香城寺石幢高四尺餘又西安府西城外有弘福寺石幢有乾符字又西安府城南牛頭寺有石幢一又城南慈恩寺有石幢二其一在塔中寺僧以之支木級此皆余所目擊其他所聞未易悉數也

昭陵各碑

苟好善醴泉誌曰昭陵諸碑著文皇后碑止存屬

鼎今併此長孫無忌碑存而字盡滅今亦不知其

碑字尚有存者僅二十一片房玄齡存五百餘字

同尚高士廉存三百餘字今許二段志玄存八百

餘字同張後微同馬周今存蘭陵公主原注云公

府撰殷仲容八各存六百餘字姜遐今存許洛仁

志偶未檢耳各存九百餘字孔穎達存千字今存

阿史那忠同崔敦禮今存各存七百餘字豆盧寬

存四百字今存薛收同張阿難同監門將軍王君

余過覓各百餘字徒存形似雀唐儉存字千一百

之不得同乙速孤行儼存字千四百同尚李靖存字千

已存同乙速孤行儼存字千四百同尚李靖存字千

五百同李勣存字千八百同乙速孤昭佑存字二

千五百餘今存千又一碑存字百五六十可辨而

前有蘭陵公主字中有詔詞曰第十九女則公主

或有二碑不可知此碑尚存可識者八百餘字詔

或當時未檢耳至所稱般仲此崇禎十一年所修

志也相去百有餘年而各碑所存之字較少於前

其二十一碑中監門將軍王君及般仲容書之蘭

陵公主碑已不可覓矣志之外余尚有尉遲敬

德存字千紀國陸先妃存字六百溫彥溥褚亮存

字四百清河長公主順義公額及碑各存形似計

余所收荀志之外又得六碑而溫彥博碑為歐陽
信本書有名字內荀志遺之何也

漢石經

漢石經在洛陽為蔡邕及堂谿典諸人所書歷晉
魏齊周喪亡殘缺隋開皇六年自洛陽載入長安
置於秘書省議欲補葺立於國學屬隋亂事寢貞
觀初魏徵始收聚之什不存一而溪叢話云有公
羊一段在長安考今西安學之石經為唐開成所
立漢之石經殘碑當亦共在一所余再三求之杳
無片石矣

六馬贊

六馬贊歐陽詢書余嘗親至昭陵摩挲六馬了無一字可識至太宗廟舊址見游景升所作昭陵圖及六馬贊已知其概及讀王阮亭居易錄載張力臣所作六馬圖贊辯剖晰甚明以力臣親至昭陵故能辯別無疑毋庸更記爰節錄力臣所著於左
昭於康熙辛亥冬至昭陵審視六馬其制琢石如屏風每方高四尺五寸廣五尺五寸厚一尺周遭邊界稜起馬身半鑿空處剝下三寸西第一四蹄端立有馬圍前立拔箭東第一西第二則三蹄立

前左一蹄作奔勢餘三則絕塵而奔各馬頭之上
一隅皆畱石一尺正方與畛邊相平隱隱有字跡
是當日刻贊處也下座每邊三馬相連各離尺許
共置一座座面之石即與地平合縫有鉸連屬是
石座無容書處也不知景封何以不察紫函以為
馬無座書誠是矣昭忍凍盤旋其旁者兩日撫摩
推測惟喜得上一隅書贊之處顯然可見想目其
地位頗狹筆法細瘦非同大書深刻更經千百載
風雨剝蝕固當漫滅幸趙氏金石錄云昭陵刻石
文六馬贊皆歐陽詢八分書世或以為殷仲容書

非是至諸降將名氏乃仲殷書耳今附於卷末是
歐殷兩書各存之徵也今馬之上方無一字可見
是歐已亡之徵也又據志云駿石居後殿左右下
一坎兩行列數石人或無上半且下埋入於土皆
不全殆視之其餘無幾安得有胸前之字是殷書
已亡之徵也紛紛懸擬不須置辯但觀趙說自明
矣